

PILIPAY

Pol Pilipay Binib Kilop Mij Tikak

¹ Yad Pol. Timoti chilmañal bi Klays Jisas nop wog giñeb ne midobul. Pen miñil chil nibop mij tikobul. Nibi Pilipay binib God yıl midil, Klays Jisas nop chig tep gil midebim okok sek, nibi biawl okok Klays binib ne okok kilop kod midebim okok sek, nibi Klays binib ne okok kilop wog giñeb okok sek, nibop midupsek mij tikobul.

² Bapi God chin ayip Biawl Jisas Klays ayip, bi apilmañal anib ak nibop yimug niñid gitep gel midtep ginimib.

Pol ne Pilipay binib okok kilop gos nigilig God nop agnigup

³⁻⁵ Nibi Klays nop dipek ñin ak tikil, yip giñem yad takaw teplep ak binib okok kilop agñi dad apil, chin jimñil wog gil agñilig nep midobun. Anib ak yad nibop pel gos nigilig God nop tep apin. Pen God nop aginig, nibop gos nigen yip tep gek nop agnepin.

⁶ Yad anib ak gos nepin, God tikjakil nibop dil wog gitep gup ak, ma keliginigab. Nibop kod mid dad amil, Klays Jisas ownigab ñin ak wog anib ak gijunigab.

⁷ Yad nibop mapen yibil lil, gos tep nigilig midebin. Yip nag lel midebin akan, takaw teplep ak, takaw niñid yibil mideb binib okok kilop agñi

tep gil kiles gil apin ak, God yip yimug ninid gitep gek wog ne kiles gil gebin. Pen nibi yip gos ninid giñem, chin ayip jimñil wog gobun. Anib ak tek, gos teplep yad won ak nibop nepin ak, teplep yibil.

⁸ God ne nigup, Klays Jisas chib nigep ne ak yip gek, nibop nigin agil pel gos kiles gil nepin.

⁹ God nop agnigen ne gek, mapen lep ak nib ayip midil, amil amil nonim ken amnimuñ. Pen gos teplep nibi amil awl ken amil, gos timud nibop yikinigab.

¹⁰ Anib ak tek, bi okok tap ginigel okok midupsek yigilil nigtep gil, teplep pal ak ninid kidek ginigabim. Pen Klays ownigab ñin ak, God nigek nibi binib yipid gil yenigabim, gach olap ma yenigab.

¹¹ Pen Jisas Klays nibop kod midakniñ, gitep yibil ginimib. Gitep yibil ginimib ak nim, binib okok kili ninid, God nop yib awl yibil agil yib nop ak dad aplanigabal. Anib ak nibop gos nigilig God nop agnepin.

Pol nop nag lelyek ak pen, Jisas takaw ne ak amil nonim ken amub

¹² Pen mam ay sikop nigim. Tap yip gipal anib okok, takaw teplep ak ma tibilikipal. Mel yibil. Yip anigipal tek, takaw teplep anib ak amil nonim ken amub.

¹³ Yip anigelak nim, bi chim kadiñ gep kili Lom gapman binonim* kal ne kod midebal okok sek,

1:8 Lom 1.9, 2 Ko 1.23 **1:9** 1 Te 3.12, Plm 6 **1:10** Lom 12.2, Epe 5.10, Plp 1.6, 2.16, 1 Te 3.13, Hib 5.14 **1:12** 2 Ti 2.9 **1:13** Apo 28.30, Epe 3.1 * **1:13** Lom binib okok, kili gapman binonim kili okok midupsek kilop Sisal ageligipal.

binib yokip okok sek, kili midupsek nepal, yad Klays wog ne ak gen niñid yip nag lipal.

¹⁴ Pen mam kunay, bi oginap yip nag lel midebin ak niñid, yip gos nigilig midebal. Anigil gos nigel, Biawl ne kilop gek gos sek midil, ma pilikil God takaw ne ak monmon agñebal.

¹⁵ Niñid yibil, bi oginap yip nigel chibol kilop ak timel gil milik yapek, Pol nop gi timel ginigel agil, God takaw ne ak agñibal. Oginap pen, gos yipid gil niñid God takaw ne ak agñibal.

¹⁶ Bi gos yipid gil nepal anib okok kili nepal, God ne yip aglek, takaw teplep ak agñi tep gil kiles gil agñen yip nag lipal. Anigil niñid, yip mapen lil takaw teplep ak agñibal.

¹⁷ Bi kilop ned apin okok pen, kili yib awl dinig Klays takaw ne ak agñibal. Gos yipid gil ma niñid anigipal. Kili Pol nag lil mideb ak mid timel yibil ginimunj agil gos niñid, Klays takaw anib ak agñibal.

¹⁸ Pen ak takaw ma mideb. Oginap gos timel nepal oginap gos tep nepal ak pen, midupsek Klays takaw ne ak agñibal. Agñel okok ameb ak nigen, yip tep yibil gup.

Klays ayip nep yenigayn

¹⁹ Yaw, yip tep yibil gup. Yad nepin, nibi God nop agnigilig midem, Jisas Klays Kawnan ne ak yip kiles ñil kod yek anib ak tek, yip yokip wisib yokel amnigayn. Anib ak yip tep yibil gup.

²⁰ Anib ak tek, gos awl yad ak, tap olap gi timel gil tek neben ma dinigayn tek lup. Mel yibil. Miñil abe

kidek abe, kiles timel gil wog teplep nep ginigayn agil gos nepin. Anib ak yad minek minek gitep gipin. Pen yad kumnigayn akan, kojim yenigayn ak, tap yad ginigayn okok midupsek Klays nop yib awl ninigayn.

²¹ Yad nepin, kojim yenigayn, Klays ayip midil wog nop ginigayn. Pen kumenigayn, tap teplep yibil dinigayn.

²² Yad pen lum awl kojim midil nim, Klays wog ne oginap sek ginim tek linigab. Anib ak taydinim yad ma nepin.

²³ Gos yip ominal owup. Kumil am Klays ayip miden, yip tep gipikop ak nim, yad amnim agil gos nepin.

²⁴ Yad pen nibop kod midil gitep ginig, lum awl nep midenim.

²⁵ Anib ak yad ke nepin, ma kumnigayn, nibi ayip yonigabun. Midil yad nibop gen, Klays nop gos linigid nonim ken amilig, miñmiñ gilig yenigabim.

²⁶ Yad anigen nim, nibi yenigabim ak tepayan amjakinigayn, nin anib ak yip nigem nibop tep gek, Klays Jisas nop chigil yib nop ak dad aplanigabim.

Kili yul dil koslam midebal ak pen, God kilop gitep gup

²⁷⁻²⁸ Pen tap awl anigil mideb, nibi Klays takaw teplep ne ak agup nep tek nigtep gil, yipid gil yibil kidek ginimib. Anigenigabim, yad apil nibop niginigayn akan, okol miden nibi tay dinigabim takaw ak apek niginigayn ak, yad anib niginim,

nibi kiles gil jak midil, jimñil yenigabim. Pen niginim, binib oginap nibop gi timel ginigabal ak, kilop niñid nibi midupsek gos timud nokom liniginigabim. Lininid, jimñil midil Klays nop gos nigep ak kiles gil dil kidek ginigabim. Pen abe niginim, nibi binib nibop gi timel ginigabal anib okok niñid, ma pilikinigabim. Ma pilikem kili nigiginigabal, kili ke kul ginigabal ak pen, God ne ke nibop tig asik dinigab.

²⁹ God nibop dil gitep gek, Klays binib ne midebim. Klays yil midil, nop gos linigem binib nop ma dipal okok kili nibop gel yul dil koslam midebim.

³⁰ Anib ak yad bine miden niñid, timel gipal tek, nibop gebal. Nibi ayip miden yip timel gelak, koslam yeligipin ak nepek. Miñil abe, yip timel gipal tek, binib oginap nibop agñel nepim.

2

Mam ay okok ayip jimñil midil, kilop gitep ginimib

¹ Klays nibop gek gos sek midebim. Ne nibop mapen lek gos kuñay ma niñid midtep gebim. God Kawnan ne ak nib ayip jimñil midebim. Mam ay okok kilop mapen niñid gitep gebim. Takaw anib anep midupsek mideb,

² anib ak tek nibi gos nokom niñid, jimñil mapen linimib. Pen chin ayip tap nokom ginigun agil gos niginimib. Anigem, yip tep yibil gek miñmiñ ginigayn.

3 Nibi gos chin ke niñid kidek gił, chin nep binib awl yonigun agil gos ak ma niğinimib. Nibi pen, binib tam okok tek midil, binib okok yib kilop dad aplanimib.

4 Chin ke midtep ginigun agil gos ak ma niğinimib. Binib okok abe midtep gilañ agil gos ak niñid, kilop gitep ginimib.

Klays ne apil bi wog giñeb tek yek, yib nop dad aplanub

5 Klays Jisas ne gos niğak tek ak, nibi gos anib ak nep niğinimib.

6 Ne God yek tek yek ak pen, yad God yib awl ne ak dinim agil gos ak ma niğak.

7 Ne ke God yek tek ak keligił, bi wog giñeb tek yek. Bi silokek, binib okok kili nop niğilak, ne ke bi yibil yek.

8 Yib ne ke dad ma aplanil, God agak tek nep gi dad amil, mid dad amil kumak. Mab bak alañ chipil pak tibik lel kumak.

9 Ne anigak anib ak tek, God Jisas nop dad aplanil, yib nop dad adek awl alañ aplanak. Pen yib teplep yibil olap nop agek, kiles awl sek yib awl adek alañ sek dak.

10 God ne Jisas nop yib awl anigił agak ak nim, kili God man ne alañ midil, lum awl midil, lum

2:3 Lom 12.10, Gal 5.26, Epe 5.21, Plp 1.15-16, Jem 3.14 **2:4** 1 Ko 10.24, 10.33, 13.5 **2:5** Mat 11.29, Jon 13.15, 1 Pi 2.21, 1 Jo 2.6 **2:6** Jon 1.1-2, 5.18, 10.33, 17.5, 2 Ko 4.4, Kol 1.15, Hib 1.3 **2:7** Jon 1.14, 2 Ko 8.9, Gal 4.4, Hib 2.14, 2.17 **2:8** Mat 26.39, 26.42, Jon 10.17-18, Lom 8.3, Hib 5.8, 12.2 **2:9** Jon 17.1-5, Apo 2.33, Epe 1.20-21, Hib 1.3-4 **2:10** Mat 28.18, Lom 14.11, Lep 5.13

muk okok midil ginigabal okok, midupsek kigom yimil nop agniginigel.

¹¹ Agnijid, midupsek agyikil aginigel, Jisas Klays ne Biawl mideb aginigel. Anib agel, Bapi God yib nop dad aplanimun.

Chin lum awl milek tek yonigun

¹²⁻¹³ Anib ak bogilak tep yad okok. Nibi ayip midil, takaw agen pel ninid kidek geligipim tek, miñil okol midebin ak, abe ginimib. Chin nopun, God ne nibop tig asik dil, nibi nab okok pelnep goligup. Ne ke nibop gos tep ne ak ñil, kiles ñakniñ, nop tep ginigab ak gun agil gipim. Anib ak nim, nibi jel gek pilikil wog kiles gil gi midem, God nibop tig asik dinigab ak, ne nibop gek anib ak dinigabim.

¹⁴⁻¹⁶ God gos ne anigil mideb, nibi ñapay ne teplepyibil yenimib. Binib sunteped takaw ma mideb okok midil, tap timel olap nab nibi ma yenimib. Pen takaw pel midep ak kiles gil dinimib ak nim, gap pogilin wisip alan milek gup tek yenigabim, binib lum awl nab okok. Binib anib okok, kili gitep gep ak keligil, pel gi timel yibil gipal. Anib ak tek, tap okok midupsek ginigabim ak, kimigel midil ginimib. Takaw kunay ma agil, takaw penpen ma aginimib. Anigenigabim, Klays adikid ownigab ñin ak, nibi gitep gipim ak gos nigen yip tep yibil ginigab. Pen yad anib niginigayn, wog awl nibop

2:10 Ais 45.23 **2:11** Jon 13.13, Apo 2.36, Lom 10.9, 1 Ko 8.6

2:12-13 Sng 2.11, Jon 15.5, 1 Ko 12.6, 15.10, 2 Ko 3.5, Epe 6.5, Plp 1.5, 1 Te 2.13, Hib 13.21, 1 Pi 1.17 **2:14-16** Lo 32.5, Ais 49.4, Dan 12.3, Mat 5.14-16, 5.45, 10.16, Lom 14.1, 1 Ko 10.10, Gal 2.2, Epe 5.1, 5.8, Plp 1.10, 1 Te 2.19, 3.5, 1 Pi 2.12, 4.9

nab okok gitep gipin ak, yokip ma gipin. Takaw apin anib anep dipim.

¹⁷ Nibi Klays nop gos linepim ak, gos anib ak God nop tap sibog ñeb tek gipim. Pen yad ma nepin, yip paklel kumen, nikim yad soginigel tek lup akan? Anigenigabal, nikim yad ñig wayn sibog ñinigel tek dil, tap nibi God nop sibog ñibim ak sek dil, ominal gil soginigel, yip tep gek miñmiñ ginigayn. Yad nibi ayip midupsek miñmiñ ginigabun.

¹⁸ Pen tap okok aniginigab ak niñid, abe miñmiñ gilig tep gaksiñ yenimib. Nibi yad ayip miñmiñ ginigabun.

Pol ne Timoti nop agyokek, Pilipay amnigab

¹⁹ Biawl Jisas yaw agenigab, ñin wulep Timoti nop agyoken am nibop niginigab. Niñid adikid apil, nibi titay dil midebim takaw anib ak agek, yip tep ginimunj. Yip anigil aginimunj agil, nop agyokinigebin.

²⁰ Timoti ne nokom yad gos nepin tek nigup. Yad nibop yimug nepin tek niñid, kilop giñinim agil pel gos nigup.

²¹ Bi oginap, kili midupsek tap kili ke nep gos niñid, Jisas Klays tap nop ak gos ma nepal.

²² Timoti ne pen yip kodek, bi apilminal tek takaw telep ak agñil wog gipul. Anib ak ne bi tep yibil midil wog gitep gup ak, nibi nepim.

²³ Anib ak pen yip titay dinigab ak kod midil niginigebin. Nigjuwil, won anib ak nop agyoken am nibop niginigab.

24 Pen yad anib ak nepin, Biawl ak yip kod midakniņ, wulep mideb yad abe apil nibop niginigayn.

Pol ne Epaplotitus nop agyokek, Pilipay amnigab

25 Pen yad nepin, mam Epaplotitus nop agyoken, adikid am nibop niginimun. Ned nibi nop agyokem yip giņinig owak. Apek, chil bi chim kadiņ gep tek midil, God wog ak jimñil gipul.

26 Miñil pen ne nibop nigin agil pel gos kiles gil nigup. Pen ne nigup, nop tap gup agel nepek, anib ak chibol yul awl yibil nigup. Anigek, yad nop agyoken am nibop niginimun.

27 Niņid apun, nop tap awl gek kubikop ak pen, God ne nop mapen nigak. Pen nop nokom mel, yip abe mapen nigak. Ne kubikop ak, yip miņel awl yibil gakniņ midebinep ak nim, nop gek ma kumak.

28 Anib ak Epaplotitus nop agyokin agil gos nokom niņid, agyoken amjakek nop niginimib. Nop niņid, tepayan miñmiñ ginimib ak nim, gos kuņay nepin tek ma niginim.

29-30 Nibi yip giņinig gos nigilig yeligipim ak nim, nop agyokem yip owak. Apil wog gil, Klays wog ne ak gil kumnig gak. Niņ anib ak yad ke midtep ginim agil gos ma nigak. Yip giņinig owak wog anib ak nep gos nigak. Miņak awl gak ak pen, miņak gos ak ma niņid pel wog kiles gil gak. Anib ak tek ne amjakek, mam chin Biawl yil ayip midobun agil, nop miñmiñ gilig ag dideg linimib. Ne ayip, bi kili

ne wog gitep gup tek gipal okok ayip, kilop yib awl linimib.

3

Bi Klays nop gos linigup ak, God ne agek bi anib ak suntep yenigab

¹ Mam ay yad okok, takaw agjunig nibop anib agebin, Biawl yil midebim tek miñmiñ ginimib. Takaw nibop ned ñu kil tikinek ak, tepayan kil tikin agen yip miñel ma gup. Tepayan kil tiken tap timel nibop ma gek midtep genigabim nim, miñil nibop kil tikebin.

² Bi oginap tap timel yibil gil, chen ladek tek midebal okok, nibi gos nigtep gil kilop asik tep ginimib. Bi anib okok, kili Yisiel binib pel geligipal tek kidek gil, wak chin tibilikinipun agil gos nepal.* Nibi pen gos nigtep gil kilop asik tep ginimib.

³ Chin pen, bi wak tibilikipal tek midil, God binib ne yipid gil midobun. God Kawnan ne ak chinop gek God nop kigom yimil agnopun. Chinop tep gek Klays Jisas yib nop dad aplanibun. Bi wak kili tibilikipal ak, tap anib okok chinop gek God binib ne yipid gil yonipun tek ma lup ak nim, gos niñid kidek ma gipun. Anib ak chin nopun, bi wak tibilikipal tek midil, God binib ne yipid gil midobun.

3:1 2 Ko 13.11, Plp 2.18, 4.4 **3:2** Sng 22.16, 22.20, Lom 2.28, 2 Ko 11.13, Gal 5.2, 5.15, Lep 22.15 * **3:2** Bi oginap binib okok kilop anigil apal, Nibi Klays binib ne yenigabim, Yisiel binib pel gipal tek kidek ginimib apal. Bi okok wak kilop tibilikinimib apal. Pol ne bi anib okok niñid, takaw kili takaw timel agebal agil, Pilipay binib okok kilop agak, Nibi gos nigtep gil kilop asik tep ginimib agak.
3:3 Lom 2.29

4 Pen bi okok wak tibilikon akan tap gitep gon, chinop gek God binib ne yipid gil yonigabun, yad midtep yibil ginigayn. Yad wak tibilikipal akan tap gitep gipal takaw ak aginig, abe apinep.

5 Yip tikil nin anep kugul ak midil, wak ak tibilikilak. Yad bi Yislel yipid gil, bi based Bejamin jij ak nim midebin. Yad Hiblu takaw ak pel apin, nap nised abe ageligipal. Pen yad bi Pelisi yenek tek, Mosis takaw nu kil tikak ak midupsek nigtep gil kidek geligipin.

6 God wog ne ak nig dad amil kiles timel ginig, binib Jisas yil okok kilop gi timel yibil geligipin. Takaw Mosis nu kil tikak ak, sikol sikol keke apun okok nigtep gil kidek geligipin tek, bi okok yip pen aginigel tek ma lak.

7 Tap anib okok ned geligipin ak, tap awl yibil yad yib awl dipin agil gos niginek. Miñil pen Klays yip giñub ak niñid nop chigin agil, tap geligipin anib okok midupsek tap yokip yibil mideb agil gos nepin.

8 Pen tap geligipin anib okok nep mel, tap anib okok midupsek nigen, tap yokip yibil mideb. Klays Jisas Biawl yad mideb ak, yad nop nigtep gipin. Gos anib ak nep tap niñid yibil mideb. Anib ak tek tap yokip anib okok, midupsek tap dayday tek lek agil pisnep keligil, Klays nop nokom kidek gil chiginim.

9 Chigil, nop yil pisnep midenim. Mosis takaw nu kil tikak ak kidek gen amnimun, yad God yip

3:4 Ko 11.18, 11.21-29 **3:5** Luk 1.59, Apo 23.6, 26.5, Lom 11.1, 2
 Ko 11.22 **3:6** Apo 8.3, 22.4, 26.9-11 **3:7** Mat 13.44-46 **3:8** Jer
 9.23-24, 1 Ko 2.2, Kol 2.2 **3:9** Lom 3.21-22, 9.30, 10.3-6, Gal 2.16

nigek bi suntep midenim agil gos ma nepin. Mel yibil. Klays nop gos linigen amnimun, yad God yip nigek bi suntep midenim agil gos nepin. Yad Klays nop gos linepin ak nim, God ne gos anib ak ninid agek, yad bi suntep midebin.

¹⁰ Klays nop nigtep gin agil nepin. Ne kumil tikjakil, kiles awl mideb ak nigtep gin agil abe nepin. Pen minel awl dilig midtep gak ak nigtep gin agil abe nepin. Ne kumak nin ak gos anib nigak ak, yad abe kumnim tek lup agil gos anib nepin.

¹¹ Anigenigayn, God ne gek yad tepayan tikjakinim agil gos ninid kod midebin.

Pol ne yad am God yil yenim agil gos ninid gek amub

¹² Yad Klays ne gup tek silok lil, bi suntep yibil midebin agil gos ma nepin. Mel yibil. Jisas Klays pen ne yip ginig chichik dup tek, minek minek yad ne gup tek kiles timel gil chichik debin.

¹³ Mam ay sikop, yad anigil gos nepin, Klays ne gup tek yad abe ginim. Pen gos nokom olap nepin, tap ned geligipin okok keligin, tap kidek ownigab okok, yad wog kiles timel gil tap anib okok dinigayn.

¹⁴ Yad kiles timel yibil gil anib sinjak amjakin agil gos nepin. Anib sinjak amjakil, tap teplep din agil gos nepin. Pen tap teplep anib ak anigil mideb, Klays Jisas wog ne gek, God ne ninid yip suk agek, yad anib alanj amil ne ayip midtep ginigabul.

3:10 Lom 6.3-5, 8.17, 2 Ko 4.10-11, Gal 6.17, 2 Ti 2.11-12, 1 Pi 4.13

3:11 Luk 14.14, Apo 4.2, 1 Te 4.16, Lep 20.5-6 **3:12** Apo 9.5-6, 1 Ti 6.12, 6.19, Hib 12.23 **3:13** 1 Ko 9.24-26, 2 Ko 5.16, Hib 6.1 **3:14** 1 Ko 9.24, 2 Ti 4.7-8, Hib 3.1, 12.1

15 Chin binib God nop chig tep gil gos nigtep gipun okok midupsek, gos anib ak tek nep niginigun. Pen gos nib ke oginap niginigabim tek, God nibop gos yipid gil nep ñinigab.

16 Pen gos tep niñid dipun okok pisnep dil, nigtep gilig gon amnimun. Gos nim ak tap awl yibil mideb.

17 Mam ay sikop. Yad gipin tek ak midupsek, nibi kidek ginimib. Pen bi oginap chin gipun tek kidek gipal ak, gipal anib ak niñijsek lil nigtep gil kidek ginimib.

18 Nibi nepim, Jisas mab bak alañ kumak takaw ak, binib takaw anib ak pel milik nepal okok, kuñay midebal. Takaw nim ak ñin kuñay nibop aginek ak, miñil abe chañ lilig anib agebin.

19 Mubwak kili ke anep gos niñid, God nop keligipal. Tap gach timel gipal ak, nebeñ ma dipal, miñmiñ gipal. Pen tap lum awl pel gos nepal. Anib ak tek kili yul dil, man timel mab ke yineb ak amnigabal.

20 Pen man chin ak, God man ne alañ. Biawl Jisas Klays, ne man anib alañ nib apil chinop tig asik dinigab ak, pel kod midobun.

21 Kiles timel yibil ne ak dil gek, tap okok midupsek nop muk okok yenigab. Pen kiles anib ak dil chinop gek, mubwak ned nib kuyig yowup ak keligil, mubwak kideyil tep ne tek ak dil yonigabun.

3:15 1 Ko 2.6, 14.20, Gal 5.10 **3:16** Lom 12.16, 15.5, Gal 6.16

3:17 1 Ko 4.16, 11.1, Plp 4.9, 1 Te 1.6-7, 1 Pi 5.3 **3:18** 1 Ko 1.23, Gal 1.7, 2.21, 6.12, Plp 1.15-16 **3:19** Lom 8.5-6, 16.18, 2 Ko 11.12, 11.15, 2 Pi 2.1 **3:20** Epe 2.6, 2.19, 1 Te 1.10 **3:21** Lom 8.29, 1 Ko 15.28, 15.43-53, Epe 1.19, Kol 3.4

4

Nibi jimñil midil, miñmiñ gil, gos teplep niñid ginimib

¹ Anib ak mam ay yad okok, nibi Biawl nop chigil kiles gil yenimib. Nibi binib mapen yad okok midebim, nibop nigin agil pel gos kiles gil nepin. Yad nibi tap tep gipim ak binib okok kilop pel agñibin. Pen nibop gos nigen, yip tep yibil gup.

² Bin Yuwodiya ayip bin Sidike ayip, yad ñilop kiles gil agebin. Ñili Biawl nop chig tep gebil tek, gos nokom niñid, jimñil yenimil.

³ Pen nad, biyad ayip jimñil wog gipul ak, nep abe agebin. Bin omiñal anib ak kilop giñe, jimñil yenimil. Bin omiñal anib ak sek, bi Klemed ak sek, binib oginap sek, kili ned yad ayip takaw teplep ak jimñil kiles gil agñoligipun. God ne yib kilop pel midep mij ayan kil tikak.

⁴ Biawl nop chig tep gebim tek, pelpel miñmiñ ginimib. Tepayan nibop agebin, miñmiñ gilig yenimib.

⁵ Biawl ak wulep apeb. Anib ak nibi binib okok kilop sayn tep yibil midem, kili niginigel, nibi anigil pel gitep gipim.

⁶ Nibop titay gek, gos awl ma niginimib. Titay ginigab ak midupsek, niñid God ayip aginimib. Nop tep agilig agniñid, chinop giñinimuñ agil agniginimib.

4:1 1 Te 2.19-20 **4:3** Sng 69.28, Luk 10.20, Lep 3.5, 20.12 **4:4** Lom 12.12, Plp 3.1, 1 Te 5.16, 1 Pi 4.13 **4:5** Hib 10.25, 10.37, Jem 5.8-9, 1 Pi 4.7, 2 Pi 3.8 **4:6** Snd 16.3, Mat 6.25-34, Luk 12.22-31, Kol 4.2, 1 Pi 5.7

7 Agnigenimib God nibop gek, kimigel midtep yibil ginigabim. Kimigel midtep gil Klays Jisas nop chig tep gil yenigabim anib ak tek, chibol sayn ak sek, gos timud nibi ak sek, midtep ginigab. God ne gek kimigel midtep gipun anib ak, tap teplep yibil mideb, gos chin ak bilokep tek ma mideb.

8 Mam ay sikop, takaw olap sek aginigebin. Tap anib okok gos nigtep gil ginimib. Tap tay ninid yibil mideb ak, tap tay binib tep gipal ak, tap tay suntep mideb ak, tap tay gach ma mideb ak, tap tay binib nigel tep gup ak, tap tay gipal nim binib nigel tep gup ak, tap anib okok nep gos nigilig yenimib. Gitap yibil gipal adek anib okok binib ninid dad aplanigel ak, anib okok nep gos nigilig yenimib.

9 Takaw nibop agñen nigtep gipek ak, gos nibop ñen dipek ak, takaw nibop agen nepek ak, tap nibi ayip midil gen nepek ak, anib okok nepek tek nep pelpel ginimib. Anigenigabim, God chinop gek kimigel midtep gipun ak, ne nib ayip nep midil kod yenigab.

Pilipay binib Pol nop tap ñel, kilop tep yibil agup

10 Nibi tepayan yip giñinig gos nigilig midebim anib ak tek, miñmiñ yibil gil, Biawl nop tep agebin. Ninid apun, pel yip gos nigilig midebim ak pen, kanib yip tap ñeb ma yek, yip tap okok ma ñem owak.

11 Yad pen ñin oginap yokip midebin gos ak ninid ma agebin. Yip titay ginigab ak, takaw ma mideb. Yad kimigel miden, yip tep yibil gilig mideb.

12 Ñin oginap tap kunay mideb, ñin oginap ma mideb, anigup ñin ak kimigel midebin. Mideb ñin ak ñibin, ma mideb ñin ak yokip midebin, anigup ñin ak kimigel midebin. Gup anib ak tap kunay yek akan, ma yek gos awl ma nepin.

13 Klays ne yip kod midil kiles ñub ak nim, yad tap okok midupsek ginim tek lup.

14 Nibi pen yad miñel oginap dil midtep ma gipin ak niñid, yip gitep gil tap ñibim anib ak, tep yibil gipim.

15 Nibi Pilipay binib okok, nibi ke nepim, Masedoniya plopens keligil, takaw teplep ned agñi ajeligipin ñin ak, binib Klays yil yelak okok oginap yip giñil tap ma ñeligipal. Nibi Pilipay binib nep yip ñeligipim.

16 Pen amil taun Tesalonayka yenek ñin ak, ñin oginap tap ma yek ak yip tap ñeligipim.

17 Yad pen tap nen ma agebin. Nibi gitep gil tap monmon ñem, God nibop tap teplep pen ñinigab agil agebin.

18 Pen bi nibi Epaploditus nop tap ñem, dapil yip ñek nim, midtep gipin. Tap yad anib okok, miñil kunay yibil mideb. Yip tap olap ma tek dup. Mel. Pen tap yip ñebim anib ak, God nop tap kuy tep owep dagil ñebim tek ak gipim. God ne tap dagil ñeb anib ak niñid, tap teplep nigek nop tep yibil gup.

19 Anib ak Klays Jisas wog ne gek, God yad ak ne bi gep yibil ak nibop kod midil, tap tay tek dinimun

4:12 1 Ko 4.11, 2 Ko 6.10, 11.27 4:13 Jon 15.5, 2 Ko 12.9-10, 2 Ti 4.17 4:15 2 Ko 11.9 4:16 Apo 17.1 4:18 Kis 29.18, Ese 20.41, 2 Ko 9.12, Epe 5.2, Plp 2.25, Hib 13.16 4:19 Sng 23.1, 2 Ko 9.8, Epe 1.7

okok ñinimuj.

²⁰ God, ne Bapi God chin ak, yib nop ak pel pelnep dad aplanigun. Yaw.

Takaw day won oginap

²¹ Yad binib Klays Jisas yil midebal okok midupsek, kilop keke ag dideg lebin. Mam yad ayip midebal okok, kili nibop ag dideg lebal.

²² Binib Klays yil midebal okok midupsek, kili nibop ag dideg lebal. Kili oginap Lom gapman binonim kal migan ne wog gebal okok, nibop ag dideg lebal.

²³ Biawl chin Jisas Klays ne nibop yimug ninjid gitep ginimuj.

Jisas Klays Takaw Teplep Ne Tay New Testament

copyright © 2013 Pioneer Bible Translators

Language: Tay (Tai)

Translation by: Pioneer Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-21

PDF generated using Haiola and XeLaTeX on 28 Dec 2024 from source files dated 29 Jan 2022

24d09cce-9a93-523a-afa5-7b091c264cee